

陳亮集

陳亮集

下
冊

中
華
書
局

陳亮集卷之十八

表

皇帝正謝表

伏以天之生才，實繫國家之造；人之用世，亦關時運之興。濟濟朋來，班班穎脫，以須選擇，不使棄遺。臣亮等恭惟皇帝陛下以聖人之大才，行天下之正道。韜英武於盛際，對易之需；據君師之至尊，爲書之範。眷言問寢，重於復讎。固將與時以偕行，詎有撫機而不發。安靜和平之福，用以宅心；發揚蹈厲之功，期於得士。臣亮等仰知聖意，俯誦謨聞，本末後先，寧無失策！短長高下，孰有遁情！悉俟聖裁，盡從官使。自今以始，寧敢竊爵祿以苟歲時；如日之升，或可依風雲而效尺寸。臣亮等下情無任激切營屏之至，謹奉表稱謝以聞。

重華宮正謝表

伏以教育之功，易世乃見；選掄之道，惟時是逢。雖三歲之故常，而一日之特異，無非自獻，蓋有從來。臣亮等恭惟壽皇聖帝陛下對越在天，倦勤與子，以不世出之資而歸之澹泊，以大有爲之志而宅以

和平。昔者論天下大計之小臣，亦嘗勸聖人隱憂之良會。一時排擯，十五載之多奇，末路遭逢，四百人之自見。共幸奮身於今日，獨知回首於當年。不肖姓名，再關天聽，已輸忠款，盡出聖謨。載惟精一之傳，無非正大之實。設科取士，雖舊貫之尚仍；陳力復讐，亦大義之難廢。共茲一轂，合彼衆材。付託得人，爰上唐家之壽，陟降在帝，孰知文后之聲！臣亮等下情無任激切營屏之至，謹奉表稱謝以聞。

啓

謝留丞相啓

數十年窮居默處，未諸豹變之懷；五千言上徹冕旒，誤中龍頭之選。顧今自喜，論古良慚，雖欲有言，莫知所謝。敬惟大丞相少保國公卓犖良臣，勤勞碩輔。重道崇儒之正學，素所講明；立綱陳紀之大經，備嘗議論。秉鈞獨當大任，持衡務適厥中。爲社稷之元龜，掌文章之司命。獻謨猷於左右，固光裕於後先。

如亮者才不逮於中人，學未臻於上達。十年壁水，一几明牕。六達帝廷，上恢復中原之策；兩譏宰相，無輔佐上聖之能。荷壽皇之兼容，恢漢光之大度。留張齊賢以遺主上，神〔傳〕〔二〕宋廣平而冠羣

儒。靜言叨冒之多，知自吹噓之力。亮青年立志，白首奮身，敢不益勵初心，期在重溫舊業。出片言而悟明主，尚愧古人；設三表以繫羣子，請從今日。若徐求其可稱，必更得於所圖。

謝葛丞相啓

平生險阻，寧一事之稱心；晚節遭逢，當上聖之信目。況更新於爰立，方共聳於具瞻。適丁斯時，當有甚幸。敬惟大丞相國公山立玉峙，地負海涵。才非求奇，貴其可用；事去已甚，取其適宜。不自知其同心，寧更防於異己。是非毀譽，肯概於胸中！小大短長，自安於度外。雖韓旋之功每極其妙，而歸宿之地卒底於平。士守常心，物無缺望。百年舊典，當漸見於施行；一日俊功，宜不爰於震動。共贊朝廷之拔士，亦令草莽之逢時。

亮少不自量，謂功名差易耳；晚史多難，雖性命其如何！忽從死灰之中，騰上烈焰之表。栽培傾覆，天亦何心！噓枯吹生，人焉有助！猥以門牆之舊物，加之場屋之陳人，忍使白頭尚作如新之態，當令赤手曾微直上之嫌。爲知己而狂言，亦無心於任運。

謝陳參政啓

暮景生涯，恍如落日；少年夢事，旋若好風。方大賢共秉國鈞之時，而一介乃有遽掩時流之幸。老之將至，人其謂何！敬惟參政相公究力古書，潛心正學。質而有韻，判一言父子之間；博以逢原，當千載

君臣之會。是膺大任，以展良圖。四海羣賢，爭先攀附，百年舊典，次第施行。方皇家陳善以閉邪，使天下回心而向道。彌綸所至，不闕毫釐；汲引而來，咸展尺寸。萌新芽於枯木，燃烈焰於死灰。

亮禍患之餘，心志凋落，塵埃之底，筆墨荒疏。獨有丹心，不渝白首。自牖納約，於焉開明；盈缶有孚，所以發志。不學近名之直，亦微慕利之諛。上於二三之中，擢在第一之選。聖恩深厚，固非臣下所能知；衆口會同，夫豈志力所可及！自天有命，無地自容。音韻琅琅，徒累巨公之讀；風期隱隱，式關上哲之懷。略轉洪鈞，悉成通路。過此以往，未知所裁。

謝趙同知啓

汲引人才，使相先後；倏經時變，寧問短長。但有向者之虛名，庶幾今茲之實用。濫叨首選，徒激壯心。自源徂流，探端知緒。敬惟同知相公蚤以文墨，自結主知；出其才猷，遂爲世用。踐更多矣，聲聞偉然。北向以復神州，固有無前之志；中立而行正道，姑從端本之謀。英流冀其相先，善類依以爲重。公輔雅望，上所屬心；宥密本衷，國焉惟屏。官則見舜朝之遜，賢豈容堯野之遺！念昔少年，及見前輩。素所自喜，兵法六韜，已而厭聞；中庸大學，坐想百年之舊，疾趨一世之雄。往暮歲時，牽連禍患。人皆欲殺，付微命於鴻毛；公不我遺，脫殘年於虎口。況遇持於文柄，欲稍復於古初。捨其舊而新是圖，望之大而小可略。使膺清問，盡致公言。上亦念其論之平，竟以先此時之選。願當聖世，合天下之異以爲同；豈無厲階，非斯人之徒而誰與！鼓同舟遇風之勢，成披雲睹日之功。出尖之才，百端並

用；易世之怨，一洗而空。伊我何心，惟公是望。過此以往，未知所裁。

謝羅尙書啓

世豈無才，不必其用；仁非爲衆，宜在夫高。苟天人之皆同，則時命之自合。故雖終遇，敢不知歸！伏念亮少張虛氣於萬夫，晚付微軀於一髮。老之將至，鄧禹笑人；人亦有言，孔子主我。得失有命，行藏信天。零落殘生，猶動諸公之至念；崎嶇拙計，誤分上聖之洪私。其使終焉，未知可也。此蓋伏遇某官受天間氣，爲國偉人。屹立漢庭，無出其右；主張周道，卒底於平。遇所不安，思必自達。猶懷晚進，孰可任於後來，遂使棄人亦有光於末路。紛然萬口，翕若一辭。如韓信者無雙，常懼鄴侯之誤；擢孫弘爲第一，卒遭武帝之憂。事固難平，人豈易識！過此以往，未知所裁。

謝曾察院啓

劫火不燼，玉固如斯；死灰復燃，物有待爾。豈是非之頓異，蓋得失之無常。衆口會同，一力推挽。不期而合，獨知所歸。伏念亮寂寞壯心，凋零餘命。藏身新進，奈種種於鬢毛；回首舊游，已班班於從列。知天人之未易合，而今古之莫能同。死蟹護臍，欲去不可；生龜脫殼，正爾良難。乃於斯時，有此大幸。茲蓋伏遇察院執事文章宗主，道德輩流。一代端人，務先汲引；百年讓論，用爲據依。以重朝廷，以尊旒扆。扶持國是，毀譽之所不遷；董勸士風，邪正於焉自別。故雖亮輩，亦取容知。越在二三，

豈不知其過分；俄陞第一，用獨抱於隱憂。爰飾空腸，試當實責。過此以往，未知所裁。

謝張侍御啓

主持公論，意獨在於機忠；叶正上心，理難施於巧智。雖或從於親擢，本亦備於先登。推其闔端，何以論報！伏念亮脫身虎口，久矣諱窮；批逆龍鱗，期於合理。庶幾一割之有用，安能百鍊而愈剛！競短爭長，無復此夢；分多共少，冀度殘生。白首駸駸，丹心隱隱。言在此而意在彼，問之顯而答之微。第其度程，亦在二三之數；決於旒展，竟成第一之傳。辱此誤知，光夫末路。此蓋伏遇侍御執事英姿沈毅，偉量洪深。國典朝章，固盛時之所習見；世科士版，亦素宣之所具宜。騰此英聲，成夫厚德。風憲之地，執守是先；才智之淵，選掄不易。欲使從風而靡，要當如日之升。獻言因惡於近諛，矯枉亦防於過直。少年勇決，記迫逐於英游；暮景安詳，務歸尊於獨智。并心一向，圖補萬分。正學以言，及明時而自獻；導人使諫，開大義以相先。公所欲爲，誰敢不應！

謝黃正言啓

文律持平，豈遽分於人品；論衡求是，亦務當於物情。累藻鑑之至明，成冕旒之小誤。足光晚景，以動壯懷。伏念亮剛銳何如，蹉跎至此。置身無所，方念背非；回首亦疑，未知孰是。豈有聖賢之學，乃爲世俗所憎！殆非其人，以招此禍。暮年前卻，私竊自憐；寸晷短長，雖爭何用！遇執至公之柄，肯

收近拙之文。使對大廷，哀然親擢；誤先衆雋，翕若誦言。非出人謀，悉從天定。此蓋伏遇正言執事英姿挺特，德性靜淵。學有源流，誠不慚於游夏；文出機杼，蓋取則於孟韓。固非堯野之肯綮，抑亦漢庭之未有。竟從王邸，收備諫工。遇事風生，輩流退縮；責難山立，左右驚嗟。持此血誠，效夫心膂。不遺餘力，曲致彌縫。猶有後憂，敢忘汲引！故雖某輩，亦及今茲，豈徒爾而激昂，蓋聞之而興起。合天下爲一體，非此爲則彼爲；極治道無兩端，苟君美而身美。

謝章司諫啓

諱窮久矣，世寧保其必遭！自視歉然，人豈容於彊附；苟不愧君子之論，斯足對上聖之知。賴此品題，幾於遇合。伏念某脫身虎口，欲求護命之符，妄意鴻冥，莫得游仙之枕。進退不知所據，往來徒自於心。隨一試之隨羣，蓋百思而無策。庶其在此，不堪稟景之懷；幸而得之，敢作少年之愛！入當大對，曲盡寸心。問所不該，言豈容於越次；意雖獨至，事亦謹於闡端。故此區區，發其耿耿。有司之所不快，越在二三；當宁以爲無他，俄從第一。僥倖至此，稱塞若何！此蓋伏遇司諫執事貌粹骨奇，神清氣勁；學傳正派，以百聖爲準繩；文擅古風，以兩漢爲機杼。鼓行場屋而無其對，驚動縉紳而爲之先。豈止嘉猷足善王邸，遂膺容谷以備諫工。知無不言，成非所計。海內人物固自如林，古來忠誠亦應有數。牽連咸在，汲引而來。識別分明，不慮人心之異；諸凡魁壘，亦惟門下之歸。上誠得人，公必知我。

謝楊解元啓

決得失於數人之目，有命者類能得之；同毀譽於萬口之辭，懷才者始克稱此。睠一時之偶幸，矧羣議之喟然。感惠有繇，撫躬知愧。竊以求賢而下問歲之詔，國有常經；糊名而收一日之長，士多苟得。立制莫踰於今密，得人無復於古如。蓋昔者相知以心，此心達而此士至；而後世相持以法，一法立而一弊生。程度愈謹而豪傑之氣漸以拘，禁防益密而曠達之人遭其辱。顧積弊之至此，豈創法之所期！故廟朝徒嘆於乏才，而川澤豈聞於遺士！雖十九之乖意，庶千一之有人。

如某者才本不羈，譽俄過實。雖本諸公之浪聽，卒爲十目之不容。蓋才者爭之端，據其端而爭日至；而名者忌之府，趨其府而忌羣興。人其奈何！天亦隨罰。憂患百罹而未艾，驚惶萬狀而莫支。既榮辱之兩忘，亦得喪之一致。一若龍而一若虎，習且不能；呼我馬而呼我牛，惟其所謂。已分息心於世故，豈期獲玷於賢書。顧脫俗之無階，謾隨人而求舉。望不及此，得之若驚。此蓋伏遇判府先生以恢廓之資，充碩大之學。百年忠骨，尙觀慷慨之遺；奕世義門，猶識薰陶之自。清望驟膺於聖眷，長才或聳於朝班。入爲持橐之華，出擁分符之重。獄訟日簡，教化浸行。致此無庸，亦叨首薦。某敢不勉其不逮，聽以無心。瓦注者巧而金注者悞，本何所係；適矢復咎而方矢復寓，庶造其精。

答陳知丞啓

講聞高誼，常恐無因；遂貶長牋，如見所畏。雖鳴謙之過厚，然視履以良勞。拜此不堪，卻則焉敢！敬惟知丞中大世德之厚，天姿之純，少小驅馳，寧憚勞於州縣；老成澹泊，肯徼福於公侯！徒以常心，安夫久次。平易近民之政，習熟見聞，忠信報上之誠，周旋啓處。猶懷晚進，及識前脩。柳下惠之不卑小官，孔文子之不恥下問，總是而往，行之亦宜。

某涉世多艱，謀身大拙。塗窮甚矣，莫知轉動之方；事變突然，殆出意料之表。本非常法，徒立下風。以之爲賢，則何所取裁；以之視民，則幾於甚墮。置之勿問，雖公事而掉頭；示以無他，付俗緣於掩耳。豈徒報謝，爲是稽遲。過此以還，未知所措。

送陳給事去國啓

伏審抗章得請，完節言還，頽俗稱高，善類太息。竊以君臣本乎一體，去就自爲兩端。苟決意以爲高，則雖留而奚補！股肱衛首，本不相知；心膂去身，宜非所樂。念之久矣，末如之何。謂微臣以罪而當行，庶明主動心而一鑒。尙期有卒，何敢自安！隱此設心，無非體國。然用捨之際，休戚相關。嗟元氣之日傷，而良醫之遽去。中夜起立，不勝惓惓之懷；明日遂行，徒重搖搖之望。敬惟某官才全而粹，氣毅以洪。風骨奇麗，可任大事；精神端重，厥有沈幾。屹爲老成，以壯吾國。頃方當路，某固鄉風，未能自處於無嫌，是以小遲而未見。百念俱冷，事忽動其隱憂；數語自通，分遂忘於僭越。

賀周丞相啓

屬者廷有大號，相則真儒，天人知歸，夷夏咸聳，緬惟慶慰。厥有英略，乃佐興王。至於守文之君，必也特重之相。兩適相求而相遇，一皆入細以入寵。洪惟本朝，獨異前古。苟在此位，無非以儒。蓋取六經之空言，發於一代之實用。人才高下，固亦多端，聖道始終，長繇一日。此三代之所以盛，而兩漢之未能純。雖使問世而生，何異比肩而立！敬惟大丞相國公萬夫之特，四國所瞻。長江大河，足以流傳〔轉〕〔〕墨客，光風霽月，足以蕩漾英游。用德宇之老成，易辭場之後發。舊人誰在，莫與同升；華貴偏儀，始膺爰立。歷數紹興渡江以後，敢忘建隆立國之初！淵源可推，聿先游夏；指揮苟定，不數蕭曹。國有人焉，天所命者。某登門雖久，參乘莫勝。心知累卵之甚危，技至屠龍而何用！不圖歲晚，遂際經綸；寧問時宜，悉垂覆蓋。

賀洪景廬除內翰啓

伏審進東觀之成書，拜北門之眞命。當爲此官久矣，或進用於下陳；顧乃於今得之，爰屹成於舊德。治朝舉此，公論翕然。竊以周置內史之官，漢重尚書之選。政事考以法令之貳，中外應以義理之文。責重望高，有四方冊命之掌；職親地密，皆一人聽治之餘。或廢或興，有因有革。翰苑起於唐室，

〔一〕據明成化本、應氏本改。

而官制崇於本朝。匪曰私人，是爲內相。玉堂夜直，動則詔王，寢殿朝參，退而視艸。以謀王體，以壯國經。維時老成，作我心膺。敬惟侍講脩史內翰襟期洒落，風度粹夷。道德文章，足以宗師一世；器能政理，足以度越羣工。羽儀廟朝，翺翔禁路。百年舊事，勒成大典以無遺；千古陳編，孰謂聖傳之可祕！蔚從人望，簡在帝心。瞻二難之迭居，宜一妙之獨殿。因嘗拜假，就使爲眞。睿意方隆，登庸所屬。嘉言善話，固已久沃於聖聰；至公血誠，行且獨開於天步。盡還舊觀，足慰具瞻。某獲從門屏之游，親睹衣冠之盛。一命再命，循牆而恭；特書大書，秉筆以俟。謹再拜遣一介奉啓事詣堦墀投納，伏惟台慈特賜鑒念。

謝王丞相啓

謗如蜩螻，莫尋解免之端；命若鴻毛，收覲生全之幸！非丞相獨主公道於上，則廷尉未爲天下之平。卒以微生，自歸洪造。伏念某性固小異，命亦多奇。縱居不擇鄉，豈爲惡人之道地！使行或由徑，寧通小吏之金錢！不察以世俗之常情，敢望以君子之大道！吏文難治，第知鍛鍊之無端；口語橫生，當信吠聲之可畏。所幸聖賢之在上，不使覺獨之向隅。雖木索加焉，失明哲保身之術；然杖笞免矣，皆照臨及物之功。還其無罪之軀，長我有道之國。此蓋伏遇大丞相國公兩朝耆德，間世偉人。小物克勤，率以畢公之正；一夫不獲，曰惟伊尹之辜。欲民無冤，繫國有政。辭雖自列，每嗟獄吏之爲尊；士不足云，亦使大夫之知免。雖微欲報之所，尙期未死以前。

謝留丞相啓

兵莫憚於志，春秋所以嚴首惡之誅；物不得其平，法令所以求顯狀之著。厥或司存之疑貳，則煩廟論之平章。小人覲其可欺，微軀恃以無恐。敢言偶幸，實賴生全。竊以有萬不同，合民命而爲國命；殺一無罪，損王心以遠天心。曾是細微之災，終累久長之福。苟其有少或似，所當明辯於十目之嚴；至於不相干，寧肯依違於衆口之鑠！判然生死之異道，由此是非之大明。伏念某暗於自知，甘於受謗。屬屢而已，誦說云乎！推平生志念之無他，欲尊主庇民而未可；嗟晚歲口語之可畏，謂殺人伏法以何疑。不圖事狀之皦然，猶待詔獄而後定。風波洶湧，尙餘勢之未平；日月照臨，幸容光之無蔽。使不及此，其將若何！此蓋伏遇大丞相少保國公弼亮兩朝，仰成元老。不以紛紜爲喜怒，不以疑似定刑誅。通一身無非至公，豈待仁聲之達；與四海同茲大慶，共觀生道之施。朝無失刑，人有定嚮。恥當吾世成大夫可去之機，尙使爾民信君子必歸之恕。事非小補，會適洪私。不勞有力之呼，無復向隅之泣。自頂至踵，橫嘉惠於不貲；鑠骨銘肌，悵餘年之無幾！

謝葛知院啓

人小有才，未知死所，世皆欲殺，要豈公心！惟愛士出於至誠，則恤刑視其大體。門牆舊物，螻蟻微生，鳴其積冤，納之洪造。伏念某少〔持〕〔時〕〔二〕跌宕，久逢闊疏。學劍何止不成，徒存逸想；讀書非

求甚解，第采高標。謾曰古心，不入俗眼。既置身於無用，宜取禍以難明。下流而致縉紳之見推，從何自取；窮居而使衣食之粗足，似若無因。謂其豪強，處以任俠。加虛謗於實事，入信語於疑心。內揣甚安，譽不爲喜而毀不爲沮；外傳大甚，惡欲其死而愛欲其生。醞在平時，合成奇禍。重以當塗之立意，加之衆怨之鑿空。人與千金，未能半信；家置一喙，猶有後言。遂煩詔獄之興，允謂事情之審。不勝讒者，尚及今茲。非廟論之至平，蓋殘生之永已。此蓋伏遇知院相公以絕人之量，涵蓋世之英。闔闕往來，歸之無事；是非好惡，泯於不爭。方其爲韋布之時，固已有公輔之器。較藝軼出，肯矜銜於己能！奕世嗣興，沉踐更於時變。收天下之小以爲大，合人情之異以爲同。敷歷班行，從容廊廟。飢溺闕於禹稷，指揮定於蕭曹。對衆一言，羣吏聳聞而加審；從旁四顧，同列熟視以生嗟。興言有識之知幾，安得無故而殺士？爲國遠慮，欲民無冤。當二三大臣之同心，何往非福！使億萬斯年之受祐，有慶惟刑。

謝胡參政啓

並建豪英，獲際不寬之世；苟全性命，頗思當痛之時。雖以自憐，敢不知幸！伏念某立志雖廣，受才則疏。少不如人，所向牆壁；老之將至，乃罣網羅。苟有一跡之可疑，豈逃十目之所指！自嗟命薄，適值途窮。一口傳虛，繫路人而爲罪；三年置對，任獄吏之便文。不思訟者之謂誰，但使仇人之逞志。鞠之又鞠，疑於無疑。殺一不辜，懼損奕世無疆之福；凡百君子，易生私愛過計之心。欲究盡於物情，

〔一〕據明成化本，應氏本改。

終上干於廟論。此蓋伏遇參政相公爲國遠慮，作時季先。稱物平施，出一代經綸之手，議獄緩死，佐九重斷制之仁。欲使民瞑目以無言，必自我平心而取決。拾一生於九死，寧勿藥無妄之災；付萬事於大公，豈施恩不報之所！有來私謝，未泯常情。

謝陳同知啓

鹿非產於庖厨，繫惟其命；盆豈干於日月，戴掩其明。嗟哉平人，有此奇禍！肯茹冤於聖世，必白事於羣公。卒以微生，自歸洪造。敢緣雅故，安出等夷！伏念某少覽古書，恐遂流於無用；晚更世故，始漸見於難通。豈求田問舍之是專，亦閉門造車之可驗。一毫以上，通緩急於里閭；終歲之間，僅飽煖其妻子。怨之所在，明者不知。苟有邪心，雖路人亦甘於就繫；至遭毒手，蓋坐客盡知其爲冤。第以當路之見憎，況復旁觀之共謗。怨家自撰於其外，獄吏文致於其中。儼然囚人，無一可免；置之詔獄，凡百謂何！詰其來繇，可爲驚駭。逮風波之既定，亦事狀之儼然。多取天地之虛名，所宜受罰；猶有鬼神之明證，終賴持平。國有人焉，事無冤者。此蓋伏遇樞密相公英姿不世，學力絕人。無遺憾於天，不求同於俗。古心古貌，讀前輩未見之書；先覺先知，得累聖不傳之學。雖泊然於世念，豈得已於時須！刑名度數之諸家，源流具涉；規矩準繩之大器，本末兼通。以典民彝，以斷國論。方求萬事之合律，不忍一夫之納溝。疇昔少年，許其託契；晚節末路，不啻如新。豈敢以冤而自言，固已無簡而不聽。恍如一夢，盡忘井邑之故吾；願以餘年，白附門牆之小物。

謝羅尙書啓

自頂至踵，橫嘉惠於諸公；與口誓心，指殘生於再世。雖施恩不求其報，而顧義必知所歸。自〔慚〕〔奇〕蹇之蹤，倍費生全之力。伏念某暗於涉世，拙於謀身。直情徑行，視毀譽如風而不恤；跋前疐後，方進退惟谷以堪驚。向也路人，俄而重辟。睽木索之皆具，寧髮膚之可全！苟以疑似殘其軀，豈敢爲當塗而自愛；至於羅織勦其命，亦恐成聖世之失刑。竟不察於人言，爰特與於詔獄。半毫以上，皆繫空無據之詞；十目之間，有左驗其明之實。平心以察兩造，低首而聽一成。獄情既真，物論惟允。死生異道，天地鬼神之鑒臨；骨肉成圜，父子夫婦之感泣。事係臯陶之種德，心知伯夷之折民。申其天休，長我王國。此蓋伏遇修史侍講判部尙書英萎不世，偉度白天。方爲布衣，固已有當世之志；及持從橐，莫不惟大賢之歸。內韜駿發之才，許員老成之望。青天白日，有是清明；靈月光風，終然洒落。軫一夫納溝之念，操萬事入律之權。小用經綸，大有闢繫。敢以平生之雅故，用爲緩急之據依。恭值仁心，遂張公道。愧惕惻隱，知納交要譽之皆非；踣躄沈埋，豈繫言蔓詞之爲瀆！僅賒九死，莫報萬分。

謝汪侍郎啓

孝敬之道素虧，權親非罪；營救之誠不至，有枉莫伸。咎皆自貽，情將誰恤！何足以關君子之念，

〔一〕據明成化本、應氏本改。